

**Komunikadu Imprensa
Tribunál Distritál Suai
10 Fevereiru 2022**

TDS kondena arguidu ho pena úniku tinan 28 prizaun tanba provadu komete krime VS ho agravasaun (insestu) no omisídiu agravadu hasoru nia oan feto no nia feen

JSMP husu tribunál atu iha futuru tenke tetu sirkunstánsia hotu bainhira aplika medida koasaun

Iha 28 Fevereiru 2022, Tribunál Distritál Suai liuhusi desizaun koletivu kondena arguidu DPP ho pena únika tinan 28 prizaun, tanba provadu komete krime Violasaun Seksuál (VS) ho agravasaun hasoru nia oan feto ho idade tinan 16 no provadu komete krime omisídui agravadu no arma brankas hasoru nia feen ne'ebé mós nu'udar testemuña okular ba krime violasaun seksuál hasoru nia oan refere, iha Munisípiu Bobonaro.

Antes ne'e, iha Marsu 2021, JSMP hatun nia komunikadu imprensa ida ne'ebé lamenta teb-tebes ba medida koasaun apresentasaun periódika semana rua dala ida ne'ebé tribunál aplika ba arguidu iha kazu VS ho agravasaun hasoru nia oan feto no ikus mai arguidu oho nia feen ne'ebé sai testemuña prinsipál iha kazu VS ho agravadu hasoru nia oan feto ne'e.¹ Tanba tuir JSMP, medida koasaun ne'ebé apropriadu liu mak prizaun preventiva.

“Pena tinan 28 nu'udar pena todan maibé relasiona ho kazu ne'e, JSMP husu ba tribunál atu iha futuru tenke tetu sirkunstánsia sira hotu bainhira aplika medida koasaun nune'e la fó biban ba arguidu atu komete tan krime seluk hanesan akontese iha kazu ne'e, ne'ebé testemuña (feen) tenke lakon nia vida tanba tribunál falla aplika medida koasaun aproriadu,” dehan Diretora Ezekutiva JSMP Dra. Ana Paula Marçal.

Hanesan JSMP mensiona iha publikasaun antes katak Kódigu Prosesu Penál (KPP) prevee klaru kona-ba rekezitu sira ne'ebé fó biban atu aplika medida koasaun prizaun preventiva. Artigu 183 KPP kona-ba rekezitu jerál ba aplikasaun medida koasaun iha alinea b haktuir katak bele iha perturbasaun ba investigasaun ka julgamento, nomeadamente tanba iha perigu ba prova ninia akizisaun, konservasaun ka verasidade no iha alinea c haktuir katak iha fundadu perigu ba arguidu atu continua atividade kriminoza ka ba atu iha perturbasaun ba ordem no trankuilidade pública, tuir krime nia sirkunstánsia

¹ Kazu arguido oho nia fen: JSMP lamenta tribunal aplika medida koasaun apresentadaun periodika ba kazu antes. Publika iha Marsu 2021 : <https://jsmp.tl/wp-content/uploads/PrKazuOmisidiunolnsestUBATUGEDETetum.pdf>

ka delinkuente nia personalidade no iha Artigu 194 (nú.1 letra a) KPP preve mós katak arguidu halo krime dolozu punivel ho pena prizaun a'as liu tinan tolu tenke aplika prizaun preventiva.

Iha kazu konkretu arguidu nia situasaun prense rekezitu sira iha Artigu 183 letra b no c KPP no Artigu 194 alinea 1 letra a KPP tanba arguidu nu'udar testemuña nia la'en rasik ne'ebé sira sei nafatin hela hamutuk iha uma ida ne'ebé bele fó risku ba testemuña nia vida ka iha possibilidade bele fó presaun ba testemuña atu la fó sai nia koñesimentu ho verdade ba kazu violasaun seksuál ne'ebé testemuña iha koñesimentu. Realidade ba kazu konkretu tanba falla aplika medida koasaun ne'ebé appropriadu ikus mai arguidu oho duni nia feen hanesan mós testemuña, ne'ebé tuir lolos bele kontribui lia loos ba tribunál maibé testemuña tenke lakon nia vida.

Ba kazu violasaun seksuál ne'ebé arguidu komete hasoru nia oan feto, prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15 no agravasaun iha artigu 173 KP, konjuga ho artigu 2(b), 3 (c), 35 (b) no 36 Lei Kontra Violénsia Doméstika (LKVD).

Enkuantu ba kazu omisídui agravadu no arma brankas ne'ebé arguidu komete hasoru nia feen, prokuradór akuza arguidu kontra artigu 139 KP kona-ba omisídui agravadu ho moldura penál tinan 12 to'o tinan 25, konjuga ho artigu 2 (a), 3 (a) 35 (b) LKVD no artigu 1 (b) 2 (f,h) artigu 20 Lei Arma Brankas.

Iha julgamentu, arguidu deklara katak la ameasa no la halo violasaun seksuál hasoru nia oan feto. Ba kazu omisídui agravadu hasoru nia feen, arguidu konfesa faktu hotu iha akuzasaun no hatutan katak lezada faan fahi la fó osan ba arguidu no lezada duun arguidu halo relasaun seksuál ho sira nia oan feto, tanba ne'e arguidu oho nia feen.

Entretantu lezada (arguidu nia oan feto) kontinua konfirma faktu sira katak arguidu komete duni violasaun seksuál hasoru nia.

Iha alegasaun finál, prokuradór konsidera faktu sira husi krime sira ne'e provadu hotu no husu ba tribunál atu kondena arguidu ba krime omisídui agravadu ho pena prizaun tinan 15 no ba krime arma brankas husu aplika pena tinan 2. Enkuantu ba krime VS iha konkursu (krime rua), kada krime prokuradór husu atu tribunál kondena arguidu ho pena prizaun tinan 8. Husi pena sira ne'e hotu, prokuradór husu atu aplika pena únika tinan 25 prizaun ba arguidu. Entretantu defeza husu ba tribunál fó justisa ba arguidu.

Depoisde tetu sirkusntánsia sira hotu, tribunál, kondena arguidu ho pena úniku tinan 28 prizaun akomula husi pena prizaun tinan 18 ba krime VS ho agravasaun hasoru nia oan feto, kondena pena prizaun tinan 18 ba krime omisídui agravadu no pena prizaun tinan 3 ba krime arma brankas hasoru nia feen.

Relaciona ho violénsia seksuál no incestu ne'ebé buras iha Timor-Leste, JSMP ezije ba Governu Timor-Leste hodi asegura rekursu adekuadu ba área importante ne'e. Timor-

Leste iha obrigasaun tuir lei internasional CEDAW, Konstituisaun Timor-Leste no lei nasional hodi fó protesaun efetivu ba feto no violénsia bazeia ba-jéneru no respeitu sira nia integridade no dignidade.

Desizaun pena masímu ba kazu sira ho natureza violénsia seksuál nu'udar mensajen ida ba komunidade katak atitude hanesan sei hetan kastigu ne'ebé todan.

Kazu ne'e rezista iha tribunal ho Nú. Prosesu 0028/20. BBBGD/ 0002/21. BBBGD, julgamentu ba kazu ne'e prezide husi juis koletivu, Dr. Benjamin Barros, Dr. Jose Maria Araújo no Dr. Naason Mário Armindo Marques Doutel. Ministériu Públiku reprezenta husi Dr. José Elo no Dr. Nelson J. S. Magno no arguidu hetan defeza husi Dr. Manuel Tilman nu'udar advogadu privadu.

Atu hetan informasaun kompletu bele kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl